

«ՆԵՐՔԻՆ ԻՆՔՆՈՒԹՅԱՆ» ԽՆԴԻՐԸ ԹՈՒՐՔԻԱՅՈՒՄ ԵՎ ՀԱՄՇԵՆՑԻՆԵՐԸ

Հայտնի է, որ փոքրամասնությունների և էթնիկ ինքնության խնդրի նկատմամբ Թուրքիայում կա զգայուն մոտեցում, և սա ինչ-որ առումով նաև բնական է մի երկրի համար, որը նման խառնիճադանջ էթնիկ նկարագրով բնակչություն ունի: Ինքնության մասին քննարկումները Թուրքիայում բավական լայն տարածում են գտնում, որոնց հանդեպ փորձում են վերաբերմունք դրսևորել և այդպիսով նաև յուրահատուկ լուծումներ առաջադրել պետական տարբեր պաշտոնյաներն ու քաղաքական գործիչները: Հատկապես կցանկանայինք առանձնացնել որոշ ժամանակ առաջ Թուրքիայի վարչապետ Ռեջեփ Էրդոհանի կողմից հրապարակ նետված այն թեզը, համաձայն որի՝ Թուրքիայի քաղաքացիները կարող են ունենալ երկու ինքնություն՝ վերին և ներքին: Վերին ինքնությունը խորհրդանշում է քաղաքացիությունը, ներքինը՝ էթնիկ ծագումը: Հարկ է նշել, որ այս մասին Էրդոհանը հրապարակավ արտահայտվել է քանիցս. մեջբերենք, օրինակ, 2005թ. նոյեմբերին Շըրնաքում արած նրա հետևյալ հայտարարությունը. «Իշխանությունները երեք կարմիր գիծ ունեն՝ էթնիկ, տեղային և կրոնական ազգայնականություն: Առաջինը էթնիկ ծագման հենքով ազգայնականությունն է, և սա մենք վերացնելու ենք: Թուրք, քուրդ, չերքեզ, լազ, բոլորս Թուրքիայի Հանրապետության քաղաքացու վերին ինքնության հովանու տակ մեկ և միասնական ենք լինելու: Ներքին ինքնությունների նկատմամբ հարգանք ենք տածելու, սակայն բոլորիս վերին ինքնությունը Թուրքիայի Հանրապետության քաղաքացիությունն է»: Էրդոհանը վերին ինքնության միտքը զարգացնելով՝ ասել է, որ Թուրքիայում կան մոտ 30 էթնիկ խմբեր, որոնց վերին ինքնությունը Թուրքիայի քաղաքացիությունն է: «Միսալ է, օրինակ, մեր քուրդ քաղաքացիներին ասել՝ «դու քուրդ չես, թուրք ես», նույնը վերաբերում է նաև լազին, վրացուն, չերքեզին, աբխազին, ալբանացուն, բոսնիացուն և այլն», - հայտարարել է Էրդոհանը: Հատկապես հետաքրքիր է 2005թ. նոյեմբերի 20-ին Շենդիլիլիում Էրդոհանի արտահայտած հետևյալ միտքը. «Թուրքը պետք է կարողանա ասել՝ ես թուրք եմ, քուրդը՝ քուրդ եմ, լազը՝ լազ եմ, չերքեզը՝ չերքեզ եմ, մեր բոլորիս վերին ինքնությունը Թուրքիայի Հանրապետության քաղաքացիությունն է»:

Ի դեպ, «վերին ինքնության» մասին Էրդոհանի միտքը նմանություն ունի նաև Օսմանյան կայսրության պանօսմանիզմի գաղափարի հետ, համաձայն որի՝ կայսրության բոլոր քաղաքացիները համարվում էին օսմանցի:

Էթնիկ ինքնության հարցի հետ ուղղակիորեն առնչվում է նաև տասնամյակներով թուրքական քաղաքական դիսկուրսում առկա հետևյալ հարցը. Թուրքիան իր բազմէթնիկ բնակչությամբ ինչպիսի՞ պետություն է՝ մոզաիկ, թե՛ մարմարե: «Մոզաիկ պետությունն» առաջին հերթին ենթադրում է երկրում ապրող տարբեր էթնիկ խմբերի գոյության ընդունում և սրանից բխող որոշ այլ հարցեր ևս (օրինակ՝ ազգային մշակույթի, լեզվի հանդեպ հարգանք և այլն): «Մարմարե պետությունը» ենթադրում է միատարր՝ թուրքական պետություն ամեն առումով, և սա էլ, իր հերթին, գրեթե մերժում է այլ էթնիկ խմբերի գոյությունն ու Թուրքիայում բնակվող բոլոր ազգերին համարում է թուրք: Էրդոհանի հայտարարությունը տպավորություն է ստեղծում, թե նա պաշտպանում է «մոզաիկ պետության» տարբերակը, ինչի մասին նույնիսկ հայտարարություն է արել: Քննարկումների ընթացքում արտահայտվեցին անգամ իրավաբաններ: Նրանցից, օրինակ, Թուրքիայի Ազգային ժողովի սահմանադրական հանձնաժողովի նախագահ Բուրհան Քուզուն հետևյալ կարծիքն արտահայտեց. «Թուրքիան նման է մարմարի, սակայն մարմարը տարբեր երանգներ ունի, որոնցից մեկն է գերակա. Թուրքիայում հենց թուրքական երանգն է գերակշռում»:

Վերին և ներքին ինքնության խնդիրը մեծ ծավալներ ընդգրկեց Թուրքիայում, իսկ վարչապետի արտահայտությունները պատճառ դարձան լուրջ քննարկումների, որոնք էլ, իրենց հերթին, ցույց տվեցին խնդրի կարևորությունը և արդիականությունը: Խնդրի վերաբերյալ

արտահայտվեցին քաղաքական, կրոնական, հասարակական գործիչներ, մտավորականներ: Ազգայնական շարժում կուսակցության («Գորշ գայլեր») նախագահ Դևլեթ Բահչելին, դեմ արտահայտվելով մոզաիկայի տարբերակին, նշել է, որ եթե Թուրքիան մոզաիկա է, ապա այդ երկրի անունը պետք է լինի «Մոզաիկիստան», «սակայն քանի որ Թուրքիա ենք ասում, ապա այս անունը թուրք ազգից է ծագում», - նշել է նա: Բողազիչի համալսարանի դոկտոր, պրոֆեսոր Ջաֆեր Ուսթյուլը, ճշմարիտ համարելով, որ գոյություն ունի ներքին ինքնություն, սահմանել է մի իրականություն. «Այդ ներքին ինքնությունները քաղաքական իրավունքներ չունեն: Քաղաքական բնագավառում պետությունը մեկ ինքնություն ունի և Թուրքիայի Հանրապետության քաղաքացիության հովանու տակ պետք է կարողանան պաշտպանել էթնիկ ինքնությունը, մշակութային իրավունքները: Այս ամենը չի կարող հանգեցնել պետության մասնատման, դաշնային մի կառույցի վերածվելու մտքին»:

Սակայն դեպքը, որը տեղի ունեցավ բոլորովին վերջերս, ընդամենը մեկն է այն ապացույցներից, որ տարբեր էթնիկ խմբերին թույլ չի տրվում պահպանել անգամ իրենց «ներքին ինքնությունը» և մշակութային արժեքները: Նրանց բոլոր ձգտումները բուռն հակազդեցության են հանդիպում ինչպես հասարակության, այնպես էլ պետական կառույցների կողմից: Ս.թ. օգոստոսին Ռիզեում ծրագրված էր անցկացնել «Յեշիլչայ Յայլա» փառատոնը, որն ունի հիմնականում մշակութային ուղղվածություն և ներկայացնում է Սև ծովի արևելյան ափերին ապրող ժողովուրդների բանահյուսական, մշակութային ժառանգության դրվագներ: Սակայն որոշ շրջանակներ, հատկապես ազգայնամոլական, աղմուկ բարձրացրին՝ հայտարարելով, թե տարբեր պատրվակներով, այդ թվում և փառատոնի, դրսի ուժերը, որոնք կապված են հայկական որոշ կենտրոնների հետ, ցանկանում են «հայկական քարոզչություն» անել: Որպես կարևոր ապացույց նշվում էր, որ հիշյալ փառատոնի հովանավորներից է ամերիկյան *The Christensen Fund* կազմակերպությունը, որն իբր թե կապ ունի հայկական սփյուռքի տարբեր կառույցների հետ: Էությամբ տոտալիտար, բայց ժողովրդավար ձևացող համակարգերին հատուկ միջոցներով կազմակերպվեց մի ակցիա, որի ընթացքում «հայկական քարոզչությամբ» «մտահոգ» մի խումբ քաղաքացիներ դիմեցին Համշենի գավառապետարան՝ խնդրելով չեղյալ հայտարարել հիշյալ միջոցառումը: Գավառապետարան դիմած «մտահոգ» քաղաքացիների խնդրանքին տեղական իշխանությունները դրականորեն արձագանքեցին, և փառատոնի Համշենի մասը չեղյալ հայտարարվեց: Համշենցիների անունից գավառապետարան դիմած Իսմայիլ Ջիհանն ասում է. «Ես ուսումնասիրել եմ փառատոնի հովանավոր ամերիկյան կազմակերպությունը, այն բավական հետաքրքիր կանոնադրություն ունի: Որպես նպատակ է նշվում ազգագրական թանգարան բացելը, որի համար պետք է աշխատանք տանել և փաստեր հավաքել: Այստեղի տեղանունները, ճաշերի անունները, համշենցիների օգտագործած որոշ բառերը հավաքում և գրանցում են: Այս փառատոնը կազմակերպվում է, որպեսզի համշենցիներին ասեն, որ նրանք թուրք չեն»:

Փառատոնի հետ կապված հանդես է եկել նաև Ռիզեի նահանգապետ Քասրմ Էսենը և ասել, որ իրենք հետևում են Սև ծովի արևելքում թուրք ազգի միասնականության դեմ կատարվող ամեն քայլի:

Սակայն, չնայած այս ամենին, փառատոնն, ի վերջո, տեղի է ունեցել, բայց ոչ թե Համշենում, այլ Ֆրնդըքը քաղաքում և բավական լավ է ընթացել: Փառատոնի կազմակերպիչներից «Գոլա» մշակույթի, արվեստի և բնապահպանության միության ներկայացուցիչ Նիլուֆեր Թաշքընը նշել է, որ փառատոնն արդեն 3 տարի կազմակերպվում է և նպատակն է աշխարհին ներկայացնել մերձսևծովյան տարածքների էկոլոգիական հարստությունները և մշակույթը, իսկ «հայկական քարոզչության» հետ կապված պնդումները հրապարակ են նետվել միտումնավոր: Փառատոնի կազմակերպիչները, ըստ երևույթին, ծանոթ և վարժված լինելով ազգայնամոլների այսօրինակ դրսևորումներին, չեն ընկրկում և պատրաստ են շարունակել իրենց գործը:

Ամենատարածված մեղադրանք-ասեկոսեն այն էր, որ փառատոնի նպատակն է քարոզել հայկական մշակույթ և հայտարարել, թե «համշենցիները հայ են»: Այս պնդման համար պատճառ է հանդիսացել «Հելեսա» երաժշտական խումբը, որի երգացանկի մեջ կան տարածքի տարբեր ժողովուրդների լեզուներով երգեր, այդ թվում և Համշենի բարբառով: Ի դեպ, հուլիսին Երևան այցելած համշենական «Վովա» խմբի հետ էր նաև «Հելեսա»-ի ղեկավար և

երգչուհի, համշենցի Այշենուր Քուլիվարը: Այսինքն՝ նման «հիստերիայի» իրական պատճառներից է Համշենի ակնհայտորեն հայկական բարբառի օգտագործումը, և, փաստորեն, սա փոքրամասնությունների մայրենի լեզվի դեմ դարերով տարվող քաղաքականության դրսևորումներից է: Ավելորդ չէ մեջբերել և վերհիշել կրկին համշենցի ռեժիսոր Օզջան Ալփերի Համշենի բարբառով նկարահանած «Մոմի» (Համշենի բարբառով՝ «Տատիկ») կարճամետրաժ ֆիլմից հետո ծայր առած հալածանքի դրսևորումները, որոնցից էր, օրինակ, դատական գործի հարուցումը երիտասարդ ռեժիսորի նկատմամբ: Նրա հիմնական «մեղքը» ֆիլմում Համշենի բարբառի օգտագործումն էր, որի տակ շատերն այլ ենթատեքստ էին փնտրում: Չավելշուն այն աստիճանի է հասել, որ հարցաքննել են նաև ֆիլմի գլխավոր «հերոսուհուն», տարեց կնոջը՝ մոմիին, որն ասել է, թե դա իր մայրենի լեզուն է: Ի վերջո, ֆիլմի լեզուն պարզելու համար դատարանը ֆիլմն ուղարկել է փորձաքննության: Պատասխանը եղել է այն, որ համշեներեն կոչվածն իրականում հայերենի բարբառ է:

Վերոհիշյալ փառատունին «հայկական քարոզչություն» անելու գաղափարը տարածեց և գուցե առաջինը հրապարակ նետեց «Գորշ գայլերի» խոսափող «Յենի չադ» թերթը՝ «Փառատունի դիմակով հայկական քարոզչություն» վերնագրով հոդվածով: Հոդվածում ասվում էր, թե իբր հայկական սփյուռքի հետ կապ ունեցող *The Christensen* հիմնադրամը 220 հազար եվրո է հատկացրել փառատունի կազմակերպման գործին: Թերթի փոխանցմամբ. «Վրդովված քաղաքացիները, «Համշենցիները հայ են» քարոզչությանն ի պատասխան, հայտարարել են, թե «Համշենցիները թուրքական ցեղ են»»: Հոդվածում մի քանի հասարակական կազմակերպությունների ղեկավարներ մտահոգություն են հայտնել Սև ծովի արևելյան շրջաններում տարվող «միսիոներական գործունեության» առիթով: Օրինակ՝ Փազար քաղաքի կրթության հիմնադրամի նախագահ Ջևաթ Չիչեքը նշել է. «Խոսում են կորուսյալ հայկական մշակույթից և ժառանգությունից: Աշխատում են Սև ծովի արևելյան շրջաններում էթնիկ անջատողականություն հրահրել»: Իսկ Ռիզեի հասարակական կազմակերպությունների միության նախագահ Բահաթթին Քարագյոզն ասել է. «Սև ծովի արևելքում հայկական «արմատ» փնտրողները միջազգային ասպարեզում այս փաստերը և տեղեկություններն օգտագործելով՝ այն թեզն են առաջ տանելու, թե «Տեսեք Սև ծովի արևելյան մասում հայկական մշակույթ կա»:

Այս ամենը ցույց է տալիս, որ թուրքական իշխանությունների՝ թեկուզ «ներքին ինքնությունը» հարգելու մասին հայտարարություններն ընդամենը խոսքեր են, իրականում բուռն կերպով շարունակվում է էթնիկ խմբերի լեզուն, մշակույթը մոռացության տալու քաղաքականությունը: Մարդկանց իրական էթնիկ ինքնությունը մոռացության տալու գործում թուրքական իշխանությունները դիմում են տարբեր միջոցների, անգամ օգտագործում են հենց նույն ծագումով համշենցիներին: Սրանք ընդամենը էժանագին ակցիաներ են, որոնց ճշմարտացիությանը չեն հավատում անգամ իրենք՝ կազմակերպիչները: Վախի մթնոլորտում ապրող համշենցիների մեջ տեղի են ունենում տարբեր գործընթացներ՝ երբեմն նաև իրական ինքնության գիտակցական մերժում, և սա Թուրքիայի պարագայում գուցե և հասկանալի է: Ամենադիպուկ օրինակն այս ամենը բնութագրելու համար մեր համշենցի ծանոթներից մեկի արտահայտած հետևյալ միտքն է, որը և խորությամբ արտացոլում է առկա հակասականությունը. «Համշենցիների մի մասը հենց հայերենով է ժխտում իր հայկական ծագումը»:

Ռուբեն Մելքոնյան
«Նորավանք» հիմնադրամ